

La "Pascion de Crist" dò Sèn Jan te la Pieif de Fascia

N concert de ecezion del Cor furlan "Claudio Monteverdi" ge vegn sport a la comunanza de Fascia en vender ai 15 de oril da les 21.00



L grop polifonich "Claudio Monteverdi" da Rude, tel Friul.

L'Istitut Cultural e l'Union di Ladins de Fascia, ensema con l'Comun e la Parochia de Vich, à l'piajer de ge sporjer a duta la comunanza de Fascia n concert de gran valuta te chest temp de careisema.

Se trata de la "Passione di Christo secondo Giovanni" del componist fiorentin Francesco Corteccia (1502-1571), portèda

dant da n cor de gran valuta, l Grop polifonich "Claudio Monteverdi" da Rude, tel Friul.

L'opera, de presciapoch 60 menut, l'è na perla de gran beleza de n componist che fosc no l'è l nonzech di maores, che la é stata troèda fora e l'è podù ruèr ensin a nos de gra al prezios lurier de reconstruzion e trascrizion del prof. Mario Fabbri (1931-1983),

musicologh che à abù n fon leam col mond ladin. La cianties del cor per latin se enterza con la recitazion (che te la verscion originèla era per fiorentin volgar del temp) per furlan, aldò de la traduzion fata da la Societât Filologiche Furlane del 2009, portèda dant te chesta neva verscion da la ouisc de Andrea Zuccolo, ator e ciantor furlan laureà al DAMS, con esperienzes de

suzzess a nivel internazionèl.

L cor "Claudio Monteverdi" l'è nasciù del 1976, l'è n organich de presciapoch 30 ciantores e te chisc 35 egn de atività l'è portà dant 660 conzerz te duta la Tèlia e ence a la foresta. L'è tout pèrt a la manifestazions de maor emportanza a nivel internazionèl, vadagnan pesè e segnalazions de prestije. Del 2003 l'è stat recognosciù "organism cultural de enteress regionèl".

Sie rich repertorie va da la musega sacrala a chela profana, spazian anter classich e populèr, dal '500 al baroch ensin ai componisc de anchecondi.

De gran emportanza l'è l contribut del Grop polifonich Monteverdi per la promozion del furlan, che se à concretisà te 8 volumes de museghes e cianties scrites e lurèdes fora dal maester Orlando Dipiazza e te desvalives CD. Recordon anter l'auter "Friuli sacro fra Otto e Novecento" sot la direzion del maester Stefano Sacher, con la "Messe Patriarchine" de mons. Albino Perosa.

L cor l'è stat vidà ensin al 1996 dal maester Orlando Dipiazza e dapò fin al 2007 dal maester

Stefano Sacher. Dal jené del 2008 l'è ret dal maester Matjaž Šček, muzist sloven de gran valuta che à ciapà ence la Targa de òr J. Gallus, l maor recognosciment de la Republica Slovena per l'empegn cultural.

Aer l met de fèr ruèr te Fascia chest event de aut nivel l'è stat de segur na bela ocazion. Envion duta la comunanza a se n emprevaler. Recordon che l concert vegnerà portà dant en vender ai 15 de oril, da les 9 da sera te la Pieif de Sèn Jan. (lg)



L "Ecce homo" sul placat de la scomenzadiva.

Chi èl pa?

Soluzion del retrat su La USC nr 13

Dant de ve dèr la soluzion de l'ultim retrat publicà su La USC numer 13, cognon ve fèr a saer che l retrat de la doi touses a Sèn Jan, publicà su La USC numer 12, l'era stat troà da Sergio Liberatore te Scrin, sit che regoi retrac, scric e etres materièi informatisc dal Istitut Cultural Ladin. Ester Piaz la ne à dit ence che l retrat era stat fat dal fotograf Guerinetto

Calligari, e ence chest l'è confermà sul sit.

L retrat che aon publicà la setemèna passèda l ne era stat portà da Franca Trottnier che stès jun Busan. De chest retrat saon che l'è stat fat sun Bufaure de sora e l'era l'invern del 1939. A ne dèr la risposta, apede a la medema Franca, l'è stat Giuseppina Rossetti, Irma Peccei e Lino

Soraperra Medico. Sul retrat l'è: 1. Marco Trottnier, mort del 1972 canche l'aea vint egn, fra de Franca de Uc; 2. Ermanno Bernard de Much (per Lino enzeve l'è Giulio Pezzei de Peter); 3. Giovanni Cavalleri che ades l stès a Ala e l'è n fi de Ida dal Contin (per Lino enzeve l'è Mario Trottnier de Uc); 4. Bruno Lorenz de Jan (Mecanico); 5. Marino Cinzola l'Ef (per Lino Adolfo Rasom de Ciaria); 6. Fabio

Pescol de Badia e 7. so fra Gino Pescol de Badia; 8. Walter Croce Bocol, maridà ta Cianacei (enzeve per Lino l'è Fabio Fanton); 9. Vito Cincelli de Cibelet; 10. Danilo Trottnier de Uc. Chesta setemèna ve meton dant n retrat enteressant ajache se pel veder ence coche se viajèa n'outa, coche era fates la corieres.

Speton voscia respostes per telefon o fax al 0462.764545, o per

mail a la direzion lausc@ladinsdefascia.it. Ge sporjon n bel devalpai a chi che se sprea a troèr fora la jent e a chi che ne porta i retrac, e i ne deida coscita a viventèr chesta rubrica e a meter ensema vèlch mizacola de storia de noscia jent: ve envion a ve fèr inant per ciapèr en don na publicazion de l'Union di Ladins.

